

Na osnovu člana 68. i člana 51. stav 2. Ustava Islamske zajednice u BiH – prečišćeni tekst, Sabor Islamske zajednice u BiH na svojoj devetoj redovnoj sjednici održanoj u Sarajevu 5. rebiu-l-ahira 1439. god. po H., odnosno 23. decembra 2017. godine, na prijedlog Rijaseta Islamske zajednice u BiH, donio je:

**PRAVILNIK O
ORGANIZIRANJU ISLAMSKE ZAJEDNICE U BOSNI I HERCEGOVINI U
DIJASPORI**

I OPĆE ODREDBE

Član 1.

Ovim Pravilnikom uređuje se način organiziranja Islamske zajednice u Bosni i Hercegovini (u daljem tekstu Islamske zajednice) u dijaspori.

Član 2.

Pod pojmom organiziranja Islamske zajednice u dijaspori podrazumijeva se način organiziranja i rad organizacionih jedinica i organa Islamske zajednice na područjima izvan Bosne i Hercegovine i drugih domovinskih zemalja (u daljem tekstu – Organizacione jedinice i organi IZ-e u dijaspori).

Član 3.

Organizacione jedinice i organi IZ-e u dijaspori, u svom radu dužni su postupati u skladu s Ustavom Islamske zajednice i drugim aktima Zajednice koje, u okviru svoje nadležnosti, donosi Sabor Islamske zajednice, reisu-l-ulema, Vijeće muftija, Rijaset, odnosno nadležna predstavnička tijela.

Član 4.

U tumačenju vjere i izvršavanju ibadetskih islamskih dužnosti organizacione jedinice i organi IZ-e u dijaspori primjenjuju maturidijski akaid i hanefijski mezheb, staraju se za ispravno razumijevanje i življenje islama, štite vjerska prava muslimana, te osiguravaju uvjete za prenošenje emaneta s ciljem da svi pripadnici Islamske zajednice žive u skladu s islamskim normama, a što se ostvaruje promicanjem dobra i odvraćanjem od zla.

A. VIZUELNI IDENTITET, PEČATI, ŠTAMBILJI

Član 5.

- (1) Organizacione jedinice i organi IZ-e u dijaspori primjenjuju i koriste prema važećim pravilima vizuelni identitet, logo i znak Islamske zajednice, usvojen od strane Sabora Islamske zajednice.
- (2) Organizacione jedinice i organi IZ-e u dijaspori imaju pečate okruglog oblika sa znakom Islamske zajednice na kojima je ispisan naziv organizacione jedinice i organa te njegovo sjedište.
- (3) Organizacione jedinice i organi IZ-e u dijaspori imaju štambilj za protokoliranje akata.

(4) Odobrenje za izradu pečata i štambilja daje Rijaset Islamske zajednice u skladu s normativnim aktima Islamske zajednice.

B. IMOVINA

Član 6.

(1) Organizacione jedinice i organi IZ-e u dijaspori mogu imati svoju imovinu.

(2) Raspolaganje imovinom iz stava 1 ovog člana vrši se u skladu s Ustavom Islamske zajednice i drugim pravnim aktima Zajednice.

Član 7.

(1) Islamska zajednica u dijaspori, na području izvan Bosne i Hercegovine i Sandžaka, Hrvatske, Srbije i Slovenije, organizira se po jedinstvenim i jednakim principima.

(2) Organizacione jedinice Islamske zajednice u dijaspori su:

- a) krovna organizacija,
- b) džemat.

(3) Krovne organizacije mogu svojim statutom, u skladu sa potrebama, urediti pitanje regionalnog povezivanja i organiziranja džemata na svom području.

(4) Organizacione jedinice Islamske zajednice u dijaspori organizirat će se na način da osiguraju efikasno obavljanje: vjerskih, obrazovnih, ekonomsko-finansijskih, administrativno-pravnih i drugih poslova iz svoje nadležnosti na području svoga djelovanja.

II ORGANIZACIONE JEDINICE IZ-e U DIJASPORI

A. Krovna organizacija

Član 8.

(1) Krovna organizacija je organizaciona jedinica Islamske zajednice u dijaspori koja obuhvata sve džemate na njenom području.

(2) Organizacija, struktura, nadležnosti i način rada organa, izbori i druga pitanja od značaja za rad krovne organizacije reguliraju se statutom krovne organizacije koji donosi skupština krovne organizacije na prijedlog izvršnog odbora, a na koji saglasnost daje Rijaset Islamske zajednice.

Član 9.

Na području Islamske zajednice u dijaspori djeluju sljedeće krovne organizacije:

- a) Islamska zajednica Bošnjaka u Njemačkoj,
- b) Islamska zajednica Bošnjaka u Sjevernoj Americi,
- c) Islamska zajednica Bošnjaka u Austriji,
- d) Islamska zajednica Bošnjaka u Švicarskoj,
- e) Islamska zajednica Bošnjaka u Švedskoj,
- f) Islamska zajednica Bošnjaka u Norveškoj,
- g) Islamska zajednica Bošnjaka u Danskoj,
- h) Islamska zajednica Bošnjaka u Francuskoj,

- i) Islamska zajednica Bošnjaka u Velikoj Britaniji,
- j) Islamska zajednica Bošnjaka u Finskoj,
- k) Islamska zajednica Bošnjaka u Beneluksu,
- l) Islamska zajednica Bošnjaka u Australiji.

Član 10.

Krovna organizacija ima svojstvo pravnog lica shodno propisima države, odnosno država u kojima djeluje, te je u svom radu dužna poštovati njen pravni sistem.

Član 11.

Organi krovne organizacije su skupština i izvršni odbor.

Član 12.

- (1) Skupštinu krovne organizacije čine izabrani zastupnici džemata.
- (2) Izbori za organe krovne organizacije organizirat će se na osnovu općeg normativnog akta koji donosi skupština krovne organizacije i na koji saglasnost daje Rijaset Islamske zajednice.
- (3) Opći normativni akt o izborima mora biti usklađen s općim izbornim načelima propisanim Ustavom Islamske zajednice i Izbornim pravilima Islamske zajednice.

Član 13.

- (1) Skupština krovne organizacije:
 - a) bira izvršni odbor,
 - b) donosi statut krovne organizacije na prijedlog izvršnog odbora, a na koji saglasnost daje Rijaset Islamske zajednice,
 - c) donosi opće normativne akte,
 - d) daje opće smjernice za rad krovne organizacije,
 - e) usvaja godišnji plan rada i izvještaj o radu krovne organizacije,
 - f) donosi budžet i usvaja završni račun krovne organizacije,
 - g) obavlja i druge poslove iz svoje nadležnosti.
- (2) Broj članova skupštine, način njihovog izbora i način rada skupštine propisuje se statutom krovne organizacije.
- (3) Skupštinu vodi predsjednik skupštine kojeg bira skupština iz reda svojih članova na mandat od četiri godine.
- (4) Predsjednik skupštine saziva i predsjedava sjednicama skupštine, potpisuje akta skupštine, sarađuje s izvršnim odborom u realizaciji nadležnosti skupštine te obavlja i druge poslove iz domena svoga rada.

1. Izvršni odbor

Član 14.

- (1) Izvršni odbor je najviši vjerski i administrativno-upravni organ krovne organizacije.
- (2) Članove izvršnog odbora bira skupština krovne organizacije na mandat od četiri godine.
- (3) Broj članova izvršnog odbora određuje se prema broju pripadnika Islamske zajednice koji žive na području krovne organizacije, kao i broju džemata koji pripadaju krovnoj organizaciji.
- (4) Izvršni odbor broji između sedam i petnaest članova od kojih su, najmanje jedna trećina, a najviše jedna polovina, nosioci vjerskog autoriteta.

(5) Broj članova, način izbora i način rada izvršnog odbora propisuju se statutom krovne organizacije.

(6) Glavni imam krovne organizacije je član izvršnog odbora po položaju.

Član 15.

Izvršni odbor:

- a) stara se o uvjetima i potrebama cjelokupnog vjerskog života na području krovne organizacije,
- b) stara se o zaštiti vjerskih prava članova Islamske zajednice na svom području,
- c) organizira i nadzire vjerske djelatnosti, aktivnosti islamskog obrazovanja i podučavanja vjeri,
- d) koordinira i provodi aktivnosti koje se odnose na prikupljanje zekata i sadekatu-l-fitra, kurbanu i hadžu u skladu s uputama Rijaseta,
- e) izvršava odluke i provodi uputstva skupštine i najviših organa Islamske zajednice,
- f) nadzire rad organizacionih jedinica i daje im uputstva za rad,
- g) utvrđuje prijedlog statuta krovnih organizacija,
- h) razmatra plan rada, plan budžeta, izvještaj o radu i izvještaj o finansijskom poslovanju džemata,
- i) brine se o prihodima i imovini krovne organizacije,
- j) organizira vjerske aktivnosti i svečanosti,
- k) sarađuje s vladinim i nevladinim institucijama u društveno-političkim procesima u pogledu islama i muslimana u zemlji u kojoj djeluje,
- l) sarađuje sa drugim islamskim zajednicama i muslimanskim organizacijama u zemlji u kojoj djeluje,
- m) sudjeluje u međureligijskom dijalogu sa kršćanskim i drugim vjerskim zajednicama u zemlji u kojoj djeluje,
- n) koordinira izgradnju i održavanje džamija, mekteba, turbeta, gasulhana i drugih objekata Islamske zajednice kao i upotrebu, održavanje i čuvanje mezarja na svom području,
- o) pomaže u osiguravanju sredstava za materijalne i finansijske potrebe džemata,
- p) podnosi skupštini na usvajanje: godišnji plan rada, izvještaj o radu, budžet i izvještaj o izvršenju budžeta,
- q) godišnji plan rada, izvještaj o radu, budžet i izvještaj o izvršenju budžeta, usvojen od skupštine, dostavlja Rijasetu Islamske zajednice,
- r) obavlja i druge poslove po nalogu viših organa Zajednice.

Član 16.

(1) S ciljem uspješnijeg rješavanja pitanja iz pojedinih oblasti, izvršni odbor može svojom odlukom formirati stručne komisije, stalne ili povremene, u zavisnosti od karaktera posla koji obavljaju.

(2) Odlukom o formiranju komisije iz prethodnog stava utvrđuju se zadaci, vrijeme djelovanja, nadležnosti i naknada za rad komisije.

Član 17.

Ukoliko Rijaset Islamske zajednice utvrdi da izvršni odbor krovne organizacije ne obavlja svoje djelatnosti u skladu sa važećim zakonima zemlje u kojoj djeluje i u skladu s Ustavom i drugim propisima Islamske zajednice, donijet će odluku o njegovom raspuštanju i naložiti održavanje skupštine u roku od 30 dana na kojoj će biti izabran novi izvršni odbor.

2. Glavni imam

Član 18.

Kao glavni vjerski autoritet na području krovne organizacije, glavni imam obavlja sljedeće poslove:

- a) tumači islamske norme,
- b) zastupa i predstavlja krovnu organizaciju u vjerskim stvarima,
- c) nadzire i koordinira rad imama i pruža im stručnu pomoć,
- d) kontrolira rad mekteba i preduzima mjere za otklanjanje uočenih nedostataka i predlaže izvršnom odboru i Rijasetu Islamske zajednice preduzimanje potrebnih mjeru za unapređenje rada u ovim oblastima,
- e) organizira vjerske aktivnosti i svečanosti,
- f) obavlja vjenčanja po šerijatskim propisima,
- g) izvršava odluke i upute reisu-l-uleme i najviših organa Islamske zajednice,
- h) održava hutbe, vazove i prigodna predavanja u džamijama,
- i) vodi brigu o cijelokupnom vjerskom životu na svom području,
- j) vodi brigu da odluke izvršnog odbora budu u skladu sa šerijatskim propisima,
- k) podnosi izvještaj Rijasetu Islamske zajednice o stanju u mektebskoj nastavi, vjeronauci i stanju vjerskog života na svom području, najmanje jednom godišnje,
- l) pokreće inicijativu za postavljenje, premješta i razrješenje imama, hatiba i muallima,
- m) provodi smjernice, uputstva i naloge muftije,
- n) obavlja i druge poslove iz svoje nadležnosti.

Član 19.

(1) Glavnog imama postavlja, premješta i razrješava dužnosti reisu-l-ulema, na prijedlog muftije.

(2) Mandat glavnog imama traje četiri godine s mogućnošću ponovnog imenovanja.

(3) Za glavnog imama može biti postavljeno lice koje ima završenu medresu i Fakultet islamskih nauka u Sarajevu, teološki ili imamski smjer, ili drugi islamski fakultet čija je diploma nostrificirana na Fakultetu islamskih nauka u Sarajevu i koje ima najmanje pet godina radnog iskustva na poslovima imama, hatiba i muallima, koji govori engleski ili jedan evropski jezik.

B. DŽEMAT

Član 20.

(1) Džemat je osnovna organizaciona jedinica na području krovne organizacije.

(2) Džemat, u pravilu, sačinjava skupina od najmanje 200 muslimanskih domaćinstava međusobno povezanih u izvršavanju zajedničkih islamskih dužnosti.

(3) Odluku o osnivanju, spajanju ili ukidanju džemata donosi Rijaset Islamske zajednice na prijedlog izvršnog odbora krovne organizacije.

(4) Za registraciju džemata kod nadležnog državnog organa s ciljem stjecanja svojstva pravnog lica potrebna je prethodna saglasnost skupštine krovne organizacije i Rijaseta Islamske zajednice.

Član 21.

(1) Naziv džemata treba da sadrži puni naziv krovne organizacije te naziv džemata s njegovim sjedištem.

(2) Džemat je obavezan koristiti vizuelni identitet (logo i znak) Islamske zajednice.

Član 22.

(1) Džemat ima statut koji donosi skupština džemata kojim bliže uređuje organizaciju i rad džemata.

(2) Džemat je dužan svoj statut dostaviti izvršnom odboru krovne organizacije na mišljenje o usklađenosti sa statutom krovne organizacije, koji isti dostavlja Rijasetu na saglasnost.

(3) Skupština krovne organizacije izrađuje, usvaja i donosi standardizirani džematski statut ili okvirne statutarne odredbe za džemate u zemlji u kojoj djeluje, na koji saglasnost daje Rijaset Islamske zajednice.

(4) Odlukom skupštine krovne organizacije džemat se obavezuje na primjenu standardiziranog džematskog statuta ili okvirnih statutarnih odredbi.

(5) Standardizirani džematski statut ili okvirne statutarne odredbe trebaju sadržavati sljedeće:

- a) jedinstvene ciljeve i svrhe udruženja koje se registrira kao džemat,
- b) regulativu koja osigurava poštivanje Pravilnika o radu imama Islamske zajednice,
- c) regulativu koja osigurava dekret reisu-l-uleme kao uvjet za upošljavanje imama,
- d) regulativu koja osigurava zaštitu vakufske imovine.

Član 23.

(1) Organi džemata su skupština džemata i džematski odbor.

(2) Standardiziranim džematskim statutom ili okvirnim statutarnim odredbama mogu biti predviđeni i dodatni organi džemata.

Član 24.

Status imama, uvjeti za prijem u službu, prestanak službe, način rada, prava i obaveze te druga pitanja od značaja za rad imama uređuju se posebnim aktom koji donosi skupština krovne organizacije, a koji mora biti usklađen sa Pravilnikom o imamima Islamske zajednice i na koji saglasnost daje Rijaset.

1. Skupština džemata

Član 25.

(1) Skupštinu džemata sačinjavaju svi punoljetni članovi džemata.

(2) Skupština džemata je nadležna da:

- a) donosi odluke koje se tiču organizacije i aktivnosti džemata i vjerskog života u džematu,
- b) bira članove džematskog odbora, zastupnike džemata u skupštinu krovne organizacije, članove ostalih organa koji su predviđeni standardiziranim džematskim statutom ili okvirnim statutarnim odredbama,

- c) pokreće inicijativu za izgradnju ili kupovinu objekata džemata (džamija, mekteb, imamski stan i drugo),
- d) pokreće inicijativu za razdvajanje velikih džemata na dva džemata ili za spajanje malih džemata u jedan džemat,
- e) daje prijedloge džematskom odboru za preduzimanje mjera s ciljem poboljšanja vjerskog života u džematu,
- f) razmatra izvještaj džematskog odbora o njegovom radu i ocjenjuje njegov rad,
- g) obavlja i druge poslove iz svoje nadležnosti.

Član 26.

- (1) Skupštinu džemata saziva džematski odbor, a njenim radom predsjedava radno predsjedništvo koje se bira na početku sjednice.
- (2) Skupština donosi odluke većinom glasova prisutnih članova, izuzev odlučivanja o statutu džemata koji se donosi dvotrećinskom većinom prisutnih članova.

2. Džematski odbor

Član 27.

- (1) Džematski odbor ima pet članova u džematima do dvije stotine domaćinstava i sedam članova u džematima sa više od dvije stotine članova.
- (2) Prilikom izbora članova džematskog odbora vodi se računa o participiranju ženske populacije i mladih.
- (3) Predsjednik džematskog odbora se bira iz reda članova džematskog odbora od strane džematskog odbora na konstituirajućoj sjednici.
- (4) Imam je član džematskog odbora po položaju, što se regulira u statutu džemata.

Član 28.

Džematski odbor je nadležan da:

- a) osigurava uvjete za vjerski život u džematu,
- b) provodi odluke skupštine i viših organa Islamske zajednice,
- c) vodi brigu o imovini džemata,
- d) u koordinaciji sa glavnim imamom učestvuje u odabiru imama u džematu,
- e) daje inicijativu po zaključku skupštine za pribavljanje potrebnih odobrenja i investiciono-tehničke dokumentacije za izgradnju, rekonstrukciju i popravku vjerskih objekata u džematu,
- f) podnosi skupštini džemata plan rada, izvještaj o radu i finansijskom poslovanju,
- g) dostavlja izvršnom odboru krovne organizacije plan rada, plan budžeta, izvještaj o radu i izvještaj o finansijskom poslovanju,
- h) obavlja i druge poslove iz svoje nadležnosti.

Član 29.

- (1) Ukoliko izvršni odbor krovne organizacije utvrdi da džematski odbor ne vrši poslove za koje je nadležan na odgovarajući način, donijet će odluku o raspuštanju džematskog odbora i naložiti skupštini džemata da izabere novi džematski odbor u roku od 30 dana.

(2) Do izbora novog džematskog odbora funkciju džematskog odbora vršit će tročlano povjereništvo koje imenuje izvršni odbor krovne organizacije.

Član 30.

(1) Predsjednik džematskog odbora predstavlja džemat u administrativnim, finansijskim i imovinsko-pravnim poslovima.

(2) Imam predstavlja džemat u stvarima vjere.

Član 31.

(1) Imovinu džemata čine vakufska dobra, imovinska prava, novčana sredstva i druga imovina.

(2) Imovina džemata služi za djelatnosti kojima se postiže cilj Islamske zajednice i ne može se koristiti u druge svrhe.

(3) Imovina džemata ima status vakufske imovine na koju se odnose pravila i propisi Islamske zajednice o vakufskoj imovini.

C. RAZRJEŠENJE DUŽNOSTI

Član 32.

(1) Član skupštine krovne organizacije ili član izvršnog odbora krovne organizacije, odnosno džematskog odbora može i prije isteka mandata biti razriješen dužnosti ukoliko je:

- a) njegovo ponašanje i rad u suprotnosti sa islamskim normama,
- b) njegov rad suprotan pozitivnim propisima te propisima i odlukama organa Islamske zajednice,
- c) nesposoban ili nemaran u izvršavanju obaveza u organu u koji je izabran,
- d) zloupotrijebio svoj položaj,
- e) podnio neopozivu ostavku.

(2) Način razrješenja dužnosti izabranih predstavnika ili članova iz prethodnog stava uredit će se statutom krovne organizacije i normativnim aktima džemata, u skladu s općim izbornim pravilima u Zajednici.

III MUFTIJA

Član 33.

Na teritoriji nadležnosti organa Islamske zajednice u dijaspori imenuju se muftije kao glavni vjerski autoriteti na području muftiluka, kako slijedi:

- a) Muftija, sa sjedištem u Njemačkoj, za područje muftiluka koji obuhvata krovne organizacije:
 1. Islamska zajednica Bošnjaka u Njemačkoj,
 2. Islamska zajednica Bošnjaka u Austriji,
 3. Islamska zajednica Bošnjaka u Švicarskoj,
 4. Islamska zajednica Bošnjaka u Švedskoj,
 5. Islamska zajednica Bošnjaka u Norveškoj,
 6. Islamska zajednica Bošnjaka u Danskoj,
 7. Islamska zajednica Bošnjaka u Francuskoj,
 8. Islamska zajednica Bošnjaka u Velikoj Britaniji,

9. Islamska zajednica Bošnjaka u Finskoj i
10. Islamska zajednica Bošnjaka u Beneluksu.

- b) Muftija, sa sjedištem u Sjedinjenim Američkim Državama, za područje muftiluka na kojem djeluje krovna organizacija Islamska zajednica Bošnjaka u Sjevernoj Americi.
- c) Muftija, sa sjedištem u Australiji, za područje muftiluka na kojem djeluje krovna organizacija Islamska zajednica Bošnjaka u Australiji.

Član 34.

- (1) Muftija, sa sjedištem u Njemačkoj, koji djeluje na području muftiluka iz člana 33, tačka (a), po funkciji, obavlja dužnost glavnog imama Islamske zajednice Bošnjaka u Njemačkoj.
- (2) Muftija, sa sjedištem u Sjedinjenim Američkim Državama, za područje muftiluka na kojem djeluje Islamska zajednica Bošnjaka u Sjevernoj Americi, po funkciji, obavlja dužnost glavnog imama Islamske zajednice Bošnjaka u Sjevernoj Americi.
- (3) Muftija, sa sjedištem u Australiji, za područje muftiluka na kojem djeluje Islamska zajednica Bošnjaka Australije, po funkciji, obavlja dužnost glavnog imama Islamske zajednice Bošnjaka u Australiji.

Član 35.

- (1) Potvrđivanje, imenovanje i razrješenje dužnosti muftije vrši Sabor Islamske zajednice na prijedlog reisu-l-uleme, na mandat od pet godina, s mogućnošću izbora na još jedan mandat.
- (2) Muftija je u radu odgovoran reisu-l-ulemi i Saboru Islamske zajednice.
- (3) Muftija je član Vijeća muftija.

Član 36.

Kao glavni vjerski autoritet na području svoje nadležnosti, muftija obavlja sljedeće poslove:

- a) tumači islamske norme i izdaje fetve,
- b) nadzire cijelokupan vjerski život na području svoje nadležnosti,
- c) nadzire rad glavnih imama, imama, hatiba, muallima i vjeroučitelja,
- d) stara se o zaštiti vjerskih prava muslimana,
- e) brine o uvjetima izvršavanja islamskih dužnosti,
- f) stara se o izvršavanju odluka i uputa reisu-l-uleme i najviših organa Islamske zajednice,
- g) predlaže reisu-l-ulemi imenovanje, razrješenje i premještaj glavnih imama, osim kada dužnost glavnog imama obavlja muftija po funkciji,
- h) daje mišljenje reisu-l-ulemi u proceduri izdavanja murasela, certifikata i dekreta imamima hatibima, muallimima, muallimama, muderrisima, vjeroučiteljima i drugim nosiocima vjerskog autoriteta na svom području,
- i) predsjedava i rukovodi Savjetom muftije,
- j) vrši i druge poslove iz svoje nadležnosti.

Član 37.

Muftija ima ured, koji obavlja protokolarne, tehničke i druge opće poslove za potrebe muftije u funkciji glavnog vjerskog autoriteta.

A. SAVJET MUFTIJE

Član 38.

Muftija ima Savjet sastavljen od svih glavnih imama i predsjednika izvršnih odbora krovnih organizacija, odnosno predsjednika skupština krovnih organizacija u kojima je glavni imam predsjednik izvršnog odbora krovne organizacije sa područja muftiluka.

Član 39.

Savjet muftije obavlja sljedeće poslove:

- a) prati stanje vjerskog života na području muftiluka,
- b) zalaže se za afirmaciju islamskih vrijednosti,
- c) reagira na procese koji su u suprotnosti s islamskim moralom i etikom,
- d) pomaže u praćenju, analizi i reagiranju muftije na važnije društvene i vjerske tokove,
- e) upoznaje se s godišnjim planom rada i izvještajem o radu muftije,
- f) daje mišljenja, preporuke i inicijative,
- g) prati stanje uvjeta i potreba vjerskog života u krovnim organizacijama i džematima na području muftiluka,
- h) pomaže u praćenju, analizi i reagiranju muftije na važnija administrativna, pravna, finansijska, privredna, imovinska, normativna i organizaciona pitanja na području muftiluka,
- i) upoznaje se s budžetom i izvještajem o realizaciji budžeta muftije,
- j) obavlja druge poslove iz svoje nadležnosti.

IV PRELAZNE I ZAVRŠNE ODREDBE

Član 40.

- (1) Ovaj Pravilnik stupa na snagu danom donošenja i bit će objavljen u službenom Glasniku Islamske zajednice.
- (2) Stupanjem na snagu ovog Pravilnika prestaju važiti svi dosadašnji akti, doneseni od strane najviših organa Sabora i Rijaseta, koji su regulirali organizaciju i rad organizacionih jedinica i organa IZ-e u dijaspori.

Član 41.

- (1) U roku od šest mjeseci od dana stupanja na snagu ovog Pravilnika, izvršit će se izbor organa propisanih novim pravilnikom.
- (2) U roku od šest mjeseci od dana stupanja na snagu ovog Pravilnika, nadležni organi Islamske zajednice u BiH u dijaspori dužni su uskladiti svoja normativna akta s ovim Pravilnikom i

ta normativna akta dostaviti na saglasnost nadležnom organu Islamske zajednice u Bosni i Hercegovini.

- (3) U roku od devet mjeseci od dana stupanja na snagu ovog Pravilnika, nadležni organ Islamske zajednice u Bosni i Hercegovini dužan je dati saglasnost na dostavljena normativna akta iz stava 2 ovog člana.
- (4) Krovne organizacije Islamske zajednice u dijaspori, izmjenu svojih akata moraju, na adekvatan način, prijaviti nadležnim državnim institucijama država, odnosno države u kojoj djeluju.
- (5) U roku od trideset dana od dana stupanja na snagu ovog Pravilnika, reisu-l-ulema Islamske zajednice u Bosni i Hercegovini imenovat će stručnog koordinatora, čija obaveza je koordinacija sprovedbe aktivnosti iz stavova 1, 2, i 3 ovog člana.

